

Mál nr. 19/2013

Ár 2014, þriðjudaginn 18. febrúar, var haldinn fundur í siðanefnd HRFÍ að Síðumúla 15, Reykjavík.

Fyrir var tekið mál nr. 19/2013

HRFÍ

gegn

A

og kveðinn upp svohljóðandi úrskurður.

I. Málsmeðferð siðanefndar.

Í erindi kæranda (HRFÍ) sem barst siðanefnd 15. október 2013 er farið fram á úrskurð siðanefndar vegna þess að kærða (A) hafi gerst brotleg við grundvallarreglur fyrir félagsmenn HRFÍ með því að para rakkann Z við tíkina X þar sem hvorugur hundurinn var með gilt augnvottorð. Kæran var send kærðu til umsagnar með bréfi dagsettu 16. október 2013 og henni gefinn andmælafrestur til 13. nóvember. Ekkert svar barst innan tilskilins frests og var kærðu send ítrekun með bréfi dags. 23. janúar 2014 og gefinn viðbótarfrestur til 30. janúar sem kærða svaraði 28. janúar og vísaði til eldri bréfaskrifta í sambærilegu máli. Þar eð siðanefnd taldi að öll gögn er máli skiptu væru fram komin þá ákvað hún að taka málið til úrskurðar.

II. Helstu málsatvik og ágreiningsefni.

Samkvæmt innsendu pörunarvottorði dagsettu 4. maí 2012 var rakkinn Z paraður við tíkina X hinn 19-21. desember 2012.. Hundarnir eru af hundakyninu Pomeranian og er rakkinn í eigu kærðu. Við pörunina var rakkinn ekki með gilt augnvottorð. Kærandi telur að með pöruninni hafi kærða brotið gegn grundvallarreglum fyrir félagsmenn í HRFÍ. Kærða svaraði því til að ástæðan fyrir því að rakkinn var ekki augnskoðaður væri sú að kærðu hefði ekki grunað að HRFÍ færi fram á slíkt þar sem það þekktist ekki í Evrópu og að þessi tegund ætti ekki við augnvandamál að stríða. Hins vegar hafi hún um leið og í ljós kom að HRFÍ gerði þessa kröfu um augnvottorð þá hafi verið farið með rakkann í augnskoðun sem hann stóðst og er nú í dag með gott og gilt augnvottorð. Þá tók kærða það fram að nú liggur fyrir beiðni frá stjórn spitzhundadeildarinnar til stjórnar HRFÍ að krafa um augnskoðun þessarar tegundar verði felld niður.

III. Forsendur.

Samkvæmt grein 2.6 í grundvallarreglum fyrir félagsmenn HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkmið sem gildir fyrir viðkomandi hundakyn og í reglugerð um skráningu í ættbók, reglur sérdeilda segir um hundakynið Pomeranian:

„Augnskoðun: Vottorð má ekki vera eldra en 12 mánaða við pörun. (Gildir frá 01.03.2009). Greinist hundur með arfgenga vaxandi sjónurýrnun (PRA) fást hvolpar

undan honum ekki ættbókarfærðir. Hundurinn, foreldrar og afkvæmi hans eru settir í ræktunarbann (Gildir frá 01.09.2012).“

Kærða hefur komið fram með útskýringar sér til málsbóta þess efnis að stjórn HRFÍ hafi ekki haft samráð við tengiliði deilda þegar sett var regla um augnskoðun fyrir allar spitzhundategundir og að nú liggi fyrir umsókn um niðurfellingu á þessari reglu fyrir tegundina Pomeranian því að tegundin eigi ekki við augnvandamál að stríða.

Siðanefnd mun ekki leggja mat á það hvort krafa um augnvottorð sé réttmæt eða ekki, heldur ítrekar hún að samkvæmt grundvallarreglum fyrir félagsmenn í HRFÍ þá skulu félagsmenn sem nota hunda sína til ræktunar vera vel að sér um það ræktunarmarkmið er gildir fyrir viðkomandi tegund og um það verður ekki deilt að á þeim tíma sem þörun fór fram var í gildi regla sem kveður á um að það að gilt augnvottorð liggi fyrir við þörun.

Kærða hefur áður hlotið áminningu vegna sama rakka og er til skoðunar í þessu máli þar sem hann var ekki með gilt augnvottorð við þörun. En kærða hefur játað brot sitt skýlaust. Hún hefur borið við athugunarleysi af sinni hálfu og skorast ekki undan ábyrgð. Hún hefur jafnframt heitið því að slíkt muni ekki henda aftur. Þykir hæfileg refsing vera að veita áminningu öðru sinni.

IV Niðurstaða

Kærða A telst hafa gerst brotleg við grein 2.6 í grundvallarreglum fyrir félagsmenn í HRFÍ.

Kærða er áminnt.

f.h siðanefndar

Anna María Flygenring

Hilmar Sigurgíslason

Kristín Sveinbjarnardóttir